

■ ORD LA VITA DA LUDMILLA CAHENZLI

Sururas da babs ed in propiest per l'onn 2006

DA LUDMILLA CAHENZLI

Dacurt essan jau e mes um Eugen stads envidads tar amis. Sin visita era anc in auter pèr. En il decurs da la saira han ils umens cumenzà a discurren da sururas. «Quest onn hai jau fatg tschienteventg sururas», ha l'emprim ditg. Sinaquai fa il segund – mes Eugen – cun in suspìr profund: «Jau hai era lavurà bler memia bler quest onn. Daspera lev'jau retrair in pau da las 200 sururas ch'jau avev fatg l'onn passà.» «Mett'avant! Jau hai uss en tut 500 sururas. 300 da quellas sururas avev'jau fatg sulet l'onn passà», raquinta il terz.

Entant ch'ils trais eroxs sa lamentan ti mordio, ma dumond'jau: Co èsi pussaivel che quests umens vegnan sin tantas sururas. Els èn la finala babs dad uffants da scola. Sa sch'els dorman en biro? U sa sch'els n'èn betg pipa da dumbrar endretg?

Cunzunt tar quel che sa gloriescha cun sias 500 sururas hai gronds dubis. El va la damaun adina pli tard a lavurar che mes Eugen (jau ves'el adina cura che jau mezza vom) ed el turna la saira adina avant mes Eugen (jau sai quai damai ch'el telefonescha

savens gia da las tschintg per far giu insatge). E vacanzas fa il mister-500-sururas adina cun ils uffants, pia minimum diesch emnas ad onn. Ma el pretenda: «Jau lavur savens la notg cura che naging vesa e fatsch là mias sururas.» Il detg bau da la notg!

Tuttenina ma crodi si che las dunnas na dian nagut. Quai n'è betg normal. Per il solit discurren mias amias uschè bler ch'ils umens na vegnan strusch en cun il pled. Ma tar il tema sururas n'han ellas para da dir nagut. Jau er betg. Anzi, jau hai plitost da zuppentar insatge. Jau sun numnadamain adina en il minus.

Betg da smirvegliar: Sche mia figlia pitschna è malsauna, stun jau a chasa. Sche mes figl ha puspè ina giada fatg ina cumpitgola ed ha ina rusna en il chau, vom jau cun el tar il medi, per schar cuser. In'emna pli tard vom jau anc ina giada cun el tar il medi per laschar trair ils fils. Sche la figlia gronda fa bunamain en las chautschas perposta dad ir tar il dentist, vom jau halt era cun ella, malgrà ch'ella fiss grond'avunda dad ir persula. Visitas da scola na lasch jau mai ora, era sch'ellas crodan sin in di da lavur. Sche la

frestgera è vida, bandun'jau la saira pli baud mes biro e vom a far cumissiuns. Sche mes um stuess manar avant ses auto e n'ha nagina peda, fatsch jau quai. Sche Eugen dovra tut surura ina gravatta naira per ir suenter bara, vom jau a cumprar ina, malgrà ch'jau stuess anc lavurar duas uras. Ed uschia en perpeten. En perpeten?

Jau guard sin mias duas amias che han sco jau in job a temp parzial. Probabel sbattan ellas pli u main cun ils medems problems. Nus essan bain tabalorias, pens jau. Da curren e curren tant che noss umens sa glorieschan cun tschients sururas.

Ma mo spetga, mes char Eugen. L'onn proxim ta gid jau a bajegiar giu tias sururas. En il 2006 surpiglias ti las visitas da scola, ils discurs cun ils scolasts, las cumissiuns en il migros e vas cun la gronda tar il dentist. Il 2006 survegn noss gronda numnadamain ina dentera, quai dat ina massa termins, e tias sururas liuan sco in toc glatsch en l'aua buglienta. E forsa mainas ti schizunt avant mes auto, perquai ch'jau n'hai forsa gist betg peda quel di ch'i fiss dad ir a mussar l'auto.

Memia severa na less jau dentant betg esser: Da schar cuser las rusnas en il chau da noss figl, surpigl'jau vinvant. Talas rusnas chaschunan sanganadas ed Eugen dat vi da mauls, sch'el vesa saun. E sche Eugen dess vi da mauls e survegniss forsa era ina rusna en il chau, stuess jau la finala tuttina bandunar pli baud mes biro ed ir a chasa a tgirar umens cun rusnas en il chau.

So, quai fiss pia mes propiests per il 2006: bajegiar giu las sururas da mes Eugen.

Era mias amias vegn jau ad orientar. Ellas suondan lura segir era mes exempel e gidan lur umens cun las sururas. Jau sun bunamain in zitg schigliusa sin l'amia cun il mister-500-sururas. Sch'ins patratga! 500 sururas, èn gea pli che 10 emnas da lavur. Entaifer quel temp pon ins accumpagnar uffants d'ina entira citad tar il dentist. E las mumas da quests uffants en questa citad pon far sururas en tutta cumadaivladad.

Jau giavisch in bun 2006, cun paucas sururas per ils umens e paucas minus-uras per las mamas.